

СОЛИҚ ТЎЛОВЧИ ЖИСМОНИЙ ШАХСЛАР ДИҚҚАТИГА!

Ўзбекистон Республикаси Солиқ кодексининг 189-моддасига асосан жисмоний шахслар 2016 йил давомида олган:

- мулкий даромадлари, агар бу даромадлар тўлов манбаида солиқ солинадиган бўлса;
- фан, адабиёт ва санъат асарларини яратилганлик ҳамда улардан фойдаланганлик учун муаллифлик ҳақи тариқасида олинган даромадлари;
- асосий бўлмаган иш жойидан олинган моддий наф тарзидаги даромадлари;
- икки ёки ундан кўп манбадан олинган даромадлари;
- Ўзбекистон Республи-

каси ҳудудидан ташқаридаги манбалардан олинган даромадлари ҳамда;

- солиқ агентлари бўлмаган манбалардан олинган даромадлардан олинган даромадлари юзасидан 2017 йилнинг 1 апрелидан кечиктирмадан жами йиллик даромадлари тўғрисида декларация тақдим этишлари лозим.
- Жисмоний шахслар жами йиллик даромадлари тўғрисидаги декларацияни доимий яшаш жойидаги давлат солиқ хизмати органига:
- шахсан ташриф буюрган ҳолда ёки ишончли вакил орқали;
- почта хизматидан

фойдаланиб, буюртма хат орқали;

Давлат солиқ қўмитасининг расмий www.soliq.uz ҳамда my.soliq.uz сайтларидаги “Электрон солиқ декларацияси” интерактив хизматидан фойдаланган ҳолда электрон шаклда тақдим этишлари мумкин.

Эслатиб ўтамиз, жисмоний шахслар томонидан жами йиллик даромадлари тўғрисидаги декларацияни тақдим этиш Ўзбекистон Республикаси Маъмурий жавобгарлик тўғрисидаги кодекснинг 174-моддаси 3-қисмига асосан жарима солишга сабаб бўлади.

ТУМАН ДАВЛАТ СОЛИҚ ИНСПЕКЦИЯСИ

РАЙХОН МЕХРИГИЁ

Эй райхон, гулларнинг меҳригиёси,
Инсон борлигини яйратган меҳвар.
Сени ҳидлаганлар олам завқ олиб,
Мафтунлиги ошар бўлиб чин дилбар.

Райхон авайларкан: табаррук этиб,
Суртди кўзга ёрим ҳидлаб димоғи.
Лабларига босди, ўпди дафъатан,
Ортиб боришидан меҳр ардоғи.

Кўнгилга сиғмаган гул очган бир ўт -
Қадр топиб дилни этди бахтиёр.
Гулдастани кучар худди мен каби
Эъозлашга бурди инон-ихтиёр.

Эй райхон, гулларнинг меҳригиёси,
Инсон борлигини яшнатган меҳвар.
Сени ҳидлаганлар олам завқ олиб,
Мафтунлиги ошар бўлиб чин ёвар.
Абдурахим НАИМОВ



САМАРҚАНДИМ

Самарқандим, она ватан, чаман гўшаси,
Богларинг ва тоғларингни севаман жондан.
Булбулларинг таронаси – бахт ашуласи,
Кучоғингда эркин ўсдим туғилган ондан.

Улуғ номинг таратганлар етти иқлимга,
Рўйи замин сайқали деб олгандирсан ном.
Ифтихорсан чин мустақил бўлган элимга,
Дунёга чўнг марду майдон этгансан инъом.

Уч минг аср ёшдасану яна навқирон,
Эллик шаҳар ичра борсан, кўрмоқ шарт бўлган.
Темуриг бор, душманларга келтирган қирон,
Шавкатлисан, зиё билан шодликка тўлган.

Истагим шу, кўкни тутсин миноринг мангу,
Регистонинг дунёга кўз бўлиб порласин.
Эл яшнаган кучоғингда янгрисин қулгу,
Кутлуғ руҳинг олам аҳлин бахтга чорласин.
Матлуба НИХОН

Назм дафтаридан ОНА ТИЛАГИ

Пешонаси ялпоқгинам,
Митти кўзи мунчоқгинам,
Хуш суратли, думбоқгинам,
Ихтиёрим – болажоним.

Ётлар бордир демагин сен,
Ҳеч дарду ғам емагин сен,
Овунчоғим, эрмагин сен,
Ихтиёрим – болажоним.

Кўзларингда кўзим бордир,
Сўзларингда сўзим бордир,
Нур чеҳрангда юзим бордир,
Ихтиёрим – болажоним.

Хизмат бурчинг адо этгин,
Ёвнинг ўқин хато этгин,
Оилангга бахт ато этгин
Ихтиёрим – болажоним.

Тўйлар қилгин – даврон сурай,
Фарзандларинг бахтин кўрай,
Бошга саллабандон ўрай,
Ихтиёрим – болажоним.

Пешонаси ялпоқгинам,
Митти кўзи мунчоқгинам,
Хуш суратли, думбоқгинам,
Ихтиёрим – болажоним.
Матлуба ҒАФУРОВА



Қизлар сирлашганда

24 март - Бутунжаҳон силга қарши курашиш куни

СИЛ КАСАЛЛИГИ БЕДАВО ЭМАС

Бутунжаҳон Соғлиқни сақлаш ташкилоти томонидан охириги йилларда силнинг ўта хавфли бацилла тарқатувчи турлари ўсиб бораётганлиги қайд этилган. Айни вақтда ер юзидаги аҳолининг учдан бир қисми сил билан зарарланган, ҳар йили 8-10 млн. киши шу дарддан касалланади, 2,5-3 млн. киши силдан ўлади. Хавфли вазият Россия, Қозоғистон ва Урта Осиё давлатларида ҳам мавжуд.

Сил касаллиги – бу сурункали, юқумли ижтимоий касаллик бўлиб, унинг кўзгатувчиси 1882 йилнинг 24 мартада буюк немис олими Роберт Кох томонидан аниқланган. Шу сабабли 24 март куни бутун жаҳонда сил касалликларига қарши курашиш куни деб эълон қилинган. Сил микробактерияси ташқи таъсирига ўта чидамли бўлганлиги сабабли табиатда кенг тарқалган. Сил микроби тарқатувчи манба бўлиб, очик турлари билан касалланганлар инсон ҳамда уй ҳайвонлари ҳисобланади. Асосий юқиш йўли нафас олиш ва ошқозон-ичак аъзоларидир.

Тиббиёт асосчилари кўрсатмаларига кўра силга чидамлилиги (иммунитети) юқори бўлган организмга тушган микроб унинг касалликка қарши курашиш хусусиятини йўқотди. Аксинча, заиф организмга сил микроби қайта-қайта тушган ҳолларда унинг тарқалиш жараёни жадаллашиб, сил микробактерияси турли аъзоларга кўнади ва касаллик ривожланади. Биринчи ўринни ўпка сили, кейинги ўринларни суяк, буйрак, жинс ва ички аъзолар сили эгаллайди. Бунгунги кунда асосий мақсад касаллик тарқатиш эҳтимоли юқори бўлган беморларни мумкин қадар тезроқ аниқлаб, уларни даволаб, касаллики бошқаларга юқтириш хавфини йўқотишдан иборат.

Кўзланган мақсадга эишиш учун ҳар бир шахснинг, оила ва жамоа аъзоларининг ўшбу хасталик тўғрисидаги тушунчаси ва билим даражаси катта аҳамиятга эга, чунки сил касаллиги аста-секин – ойлар, йиллар давомида ривожланади.

Шифокор эрта аниқланган беморнинг тўла даволанишини кафолатлайди.

Силнинг ривожланишига туртки бўладиган омиллар бетартиб турмуш тарзи, руҳий изтироблар, зарарли одатлар (ичкиликбозлик, кашандчилик, гиёҳвандлик) ўткир ва сурункали инфекциялар, оғир кечувчи касалликлар (ОИВ, қанд касаллиги, сурункали ўпка касалликлари, ошқозон яраси ва х.к) кирди. Ушбу омиллардан атиги биттаси бўлган ҳар бир шахс албатта шифокорга мурожаат қилиб, махсус текширишлардан ўтиши шарт.

Сил касаллиги ривожланиши жараёнида дастлаб қувватсизлик, иштаҳанинг пасайиши, озиб кетиш, тана ҳароратининг кўтарилиши, кейинчалик йўтал, балғам ажралиш, кўкрак соҳасида оғрик ва ҳатто қон тупуриш каби белгилар кузатилади. Силнинг дастлабки белгилари бўлган даврда киши ўз аҳволига эътиборсизлик билан қарайди, шифокорга мурожаат қилмайди, ёки мустақил даволанишга уринади.

Йўтал, балғам пайдо бўлиши ўпка силига хос бўлиб, агар улар 2-3 ҳафтадан кўп давом этса бемор дарҳол шифокорга мурожаат қилиб, қон ва балғам таҳлили ва флюорографиядан ўтиши лозим.

“Касаллиқни даволанишдан қўра унинг олдини олиш афзал” эканлиги тиббиётда тасдиқланган. Силнинг олдини олишда БЦЖ ёрдамида чақалоқлар эмланади, силга мойил кишиларда химиофилактика ўтказиш, сил беморлари бўлган хонадонларда жорий ва якуновчи зарарсизлантириш билан бирга организмни чинқитириш, санитария-гигиена қоидаларига риоя қилиш, вақтида тўйимли овқатланиш, дам олиш каби соғлом турмуш тарзини аҳамияти ҳам каттадир.

М.ШУКУРОВА,
Туман тиббиёт бирлашмаси силга қарши курашиш бўлими мудир,
олий тоифали физио-педиатр
А.УЗОҚОВ,
тиббиёт фанлари номзоди

Тахирсиз хат МИРОНҚУЛ ҲАЁТИДАГИ МУАММОЛАР

Баланд тоғлари, намхуш хавоси, шифобахш булоқлари, меҳмондўстлиги ҳамда бошқа дилтортар истироҳат бoғлари билан ажралиб турадиган Миронқул қишлоғи ўз раванқини топиб, кундан-кунга чирой очмоқда. Албатта, бундай жойни қанчалар таърифласак шунчалар камдек туюлаверади. Лекин афсуски қишлоқда баъзи бир камчиликлар ҳам йўқ эмас. “Қишлоқнинг турмуш ҳаёти яхши, аммо истисноли жойи шундаки, қишлоқ поликлиникаси хароба ҳолга келиб, ҳозирги замон талабларига жавоб бермайди. Бизнинг қишлоғимизда янги, чиройли поликлиника қурилишини, шинам ва иссиқ бўлишини хоҳлаймиз, бу қишлоқ аҳлини азалий орзуларидан бири ҳисобланади”, дейди 25 йилдан ошқирроқ мана шу ерда халққа беминнат хизмат қилиб келаётган катта ҳамшира Ражаббиди Аминова. Шу ўринда айтиш жоизки, шу вақтгача дорихона йўқлиги учун аҳоли қийналмоқда, дори-дармон керак бўлса шаҳарга тушишга, шаҳарга тушиш учун автомобил билан бориш ва албатта йўл кира тўлашга тўғри келади.

–Дорихона қурилишини биз жуда ҳам истаймиз, агар қурилганида жуда яхши иш бўлар эди, халқимизнинг бир муаммоси барҳам топилар эди,-дейди қишлоқнинг маҳалла шифокорларидан Сайёра Содикова.

Қишлоқнинг яна бир муаммоси шундан иборатки, йўлларнинг нотекислигидан халқ азият чекмоқда. Бир неча марта йўлларнинг гадир-будурини тўғрилаш мақсадида халқ томонидан ҳашарлар ўтказилиб келинмоқда, лекин ёмғир ёёса тамом, яна аввалги ҳолига қайтади. Бундан ташқари йўл четларида транспорт кутиш учун бекатлар қурилмаган. Қишнинг қоридан, баҳорнинг ёмғиридан, ёзнинг иссиғидан, кузнинг шамолидан соғлигимизни асраш мақсадида бекатлар қурилишини истиади қишлоқнинг ёшу қариси. Бу ер одамларининг азалий орзуларидан яна бири бўлмиш автобус масаласи. Агар автобус келса, жуда ҳам зўр иш бўлар, айниқса талабаларга моддий томондан ёрдам қилинган бўлар эди.

Президентимиз Шавкат Мирзиёев раҳбарлигида жорий йил “Халқ билан мулоқот ва инсон манфаатлари йили” деб белгиланганлиги муносабати билан юқорида айтиб ўтилган муаммолар ечим топишини жуда истаймиз.

Ситорамоҳ ИСАЕВА,
коллеж ўқувчиси

БИЛМАЙ БОСИЛГАН ТИКОН

Халқимизда «Билмайин босдим тиконни, тортадурман жабрини...» деган ҳикмат бор. Бир ишни билмасдан қилиш, охирини ўйламастан амалга ошириш «Билмай босилган тиконга...» ўхшайди. Судланувчи Ўзбекистон фуқароси, 3 нафар фарзанднинг отаси, бир марта қамоқ жазосини ўтаган Рахимов Орзикул Тошпўлатович билмай қилган иши туфайли яна бир бор қамалишга мажбур бўлди.

Ҳеч қим қайси динни қабул қилишдан чекланмаган, виждон эркинлиги ка-

фолатланган. Шунинг учун Ислоий амалларни бажариб, беш вақт намозини ўқиб юрган О.Рахимов кейинги пайтларда «ҳижрат», «жиҳот» сўзларини кўп бор такрорлайдиган бўлди. Унинг гаразли ниятларидан воқиф бўлган Хожа Аҳрори Вали жомеъ масжиди хатий-имомни Б.Шарипов ҳуқуқ-тартибот идоралари ходимларига айтишга мажбур бўлади. Ишлари юришмай қолгандан фойдаланган О.Рахимов Россия Федератив Республикаси ва Суриядаги танишларига кўнғироқ қилиб ёнларига

чақиришларини сўрайди. Бўзқоннинг югургани сомонхонагача, деганларидек ҳуқуқ-тартибот идоралари ходимлари О.Рахимовни тезда қамоққа олишди. Тергов органи томонидан унинг диний экстремизм, сепаратизм ва ақидапарастлик гоғялари билан йўғрилгани аниқланиб, Ўзбекистон Республикаси ЖК 2442-моддасининг 1-қисми билан квалификация қилиниши айтилди.

Шунда у ёлғон-яшиқ сўзларни ишлатиб кўрсатма беришга ўтади. Лекин, одилона терговга ҳаммаси

аён бўлди. Судда Рахимов Орзикул Тошпўлатович берган кўргазмасида ўз айбига иқроорлик билдирмасида ашъвий далиллар, гувоҳларнинг кўрсатмалари унинг айбдор эканлигини исботлади.

Суд судланувчи Рахимов Орзикул Тошпўлатовичга жазо тайинлашда оғирлаштирувчи ҳолатлар йўқ, деб жазони енгиллаштирувчи томонларини, оилада ягона боқувчи эканлигини, қарамоғида 3 нафар фарзанди борлигини инобатга олиб жазо тайинлади.



Ўзбекистон Республикаси ЖК 2442-моддасининг 1-қисмига биноан унга муддати беш йил озодликдан маҳрум қилиш жазоси тайинланди. Билмай босилган тикон жабрини ўтириб тортиши, қилмиши нотўғри эканлигини обдон ўйлаши мумкин.

Б.АБДУВАХИДОВ,
жиноят ишлари бўйича туман суди судьяси

✉ Тахририятга келган бирорта хат эътибордан четда қолмайди. ✉



МУАССИСЛАР:
Халқ депутатлари Самарқанд туман Кенгаши ва туман ҳокимлиги

Мухаррир:
Нормурод КАРИМОВ

Газета Самарқанд вилоят
Матбуот ва ахборот
бошқармасида 16.01.2007 йил
09-18 рақами билан рўйхатдан
ўтган. Индекс 615

Эл.почта: gulobodtongi@gmail.uz

Газета тахририят компютерида терилди ва «Шердор плюс полиграф» МЧЖда офсет усулида босилди. Корхона манзили: Самарқанд шаҳри, У.Турсунов кўчаси, 82-уй

“Гулобод” АБ. МФО 00929.
Х/р 20210000200439068001. ИНН: 200776484. ОКОНХ: 87100.

Масъул котиб: **Н. ОЛИМОВ**
Саҳифаловчи: **А. ИСЛОМИЙ**
Навбатчи: **Д. НАСИМОВА**

Газета бир ойда 4 марта, ўзбек ва тожик тилларида чиқади

Босишга топшириш вақти: 16:00 Босишга 22 март куни соат 17:20 да топширилди.

Манзилимиз: Самарқанд туман, Гулобод кўргони, туман давлат солиқ инспекцияси биноси.
Телефонлар: 612-51-04, 508-83-51

4910 нусхада чоп этилди. Буюртма _____
Қоғоз бичими А2 t - тижорий материал

Сотув эркин нархда.